

## Ho Ikamahanya ka Tsela e Thabisang



### SABATHA THAPAMA

#### **Bakeng sa Boithuto ba Beke Ena Bala:**

*Gen. 1:1, 2, 26; Exod. 18:21-25; 1 Bakor. 12:12-25; Liketso 16:11-15, 40; Liketso 4:31; Liketso 12:12.*

#### **Teman'a Khopolo:**

“‘Ebile moo a reng ho barutuoa ba hae; kotulo e kholo ruri, empa basebetsi ha ba bakae. Rapelang ke hona Morena oa kotulo, hore a romele basebetsi kotulong ea hae’ ” (Mattheu 9:37, 38).

**M**otho e mong o itse, “Matla a teng bongateng,” ka tsela e itseng, taba ena ke ‘nete. Na u kile oa eelloa hore u ba sehlahlo ho ikoetlisa ha u koetla le sehlopha sa batho ho feta ha u tlameha ho etsa joalo u le mong letsatsi ka leng? Batho ba bangata ba ikopanya le lihlopha tsa bophelo bo botle, tsa boikoetliso, hobane ba lumela hore ba tla koetla haholo le ho natefelo haholo ha ba koetla le batho ba bang. Ka tsela e tšoanang, Molimo o re bopetse kopano. Re batho ba likamano, joalo feela ka boikoetliso, ho joalo ka lintho tse ngata tsa bophelo: re etsa hantle ka ho fetisa ha re na le tšhetso ea batho ba bang. Taba ena ke ‘nete haholo litabeng tsa moea. Bibeleng eohle, lihlotšoana li totobatsoa e le oona mokhoa oa Molimo oa ho matlafatsa tumelo, ho eketsa tsebo ea rona ea lentsoe la Hae, ho tebisa bophelo ba rona ba thapelo, le ho re koetlisetse bopaki. Ntate, Mora, le Moea o Halalelang ba nkile karolo bosebeletsing ba lihlotšoana. Moshe e ne e le moetapele oa sehlotšoana. Jesu o ile a theha sehlotšoana sa Hae sa barutuoa, le moapostola Pauluse o ile a tsamaea lefatše la Roma le sehlotšoana sa bopulamaliboho ba baevangeli. Nakong ea boithuto ba beke ena, re tla tsepama holim’a Bible e le motheo oa lihlotšoana, ‘me o tla fumana tsela e thabisang ea ho ikamahanya.

*\*Ithute thuto ea beke ena ho lokisetsa Sabatha sa la 5 Loetse.*

## Lihlotšoana: Maikutlo a Molimo Pele

**Bala Genese 1:1, 2, 26; Baheberu 1:1, 2; le Baefese 3:8, 9. Litemana tsee li senola bonngoe ba Molimo joang?**

Ntate, Mora, le Moea o Halalelang ba sebelitse ‘moho Tlhohong. Bohle ba ne ba na le mesebetsi e fapaneng empa ba e phetha joalo ka tlamahano e ke keng ea arohana. Ntate e ne e le Eena Moqapi oa Sehlooho. O ntšelitse merero ea Hae pele ka Jesu, e le Eena moromuoa ea tšebetsong Tlhohong hammoho le matla a Moea o Halalelang. Ketso e joalo e fetisang matla a botho e kaholimo ho kutloisisang ea rona. Seo re ka se utloisisang, ‘me ka ho hlaka le teng, ha se feela bonnete ba lefatše le hloliloeng le maholimo, empa ele hore Molimo ka sebele o li entse tsohle (sheba Baroma 1:18–20).

Lihlotšoana e ne e le maikutlo a pele a Molimo. Leha motho a lokela ho ba hlokolosi ka ho sebelisa lipapiso ho hlalosa lintlha tse ngata tsa sephiri tsa Molimo, ha re sebelise e ‘ngoe ha bobebe feela re re Ntate, Mora, le Moea o Halalelang e ne le “sehlotšoana sa pele” nalaneng ea pholoho. Ba sebelitse ‘moho ho bopa leloko la botho ‘me hamorao topollo ea lona kamor’a ho Oa.

**Bapisa Johanne 10:17, 18 le Baroma 8:11; le 1 Bakorinthe 15:15. Tsoho ea Kreste e bontša bonngoe ba Ntate, Mora, le Moea o Halalelang joang leanong la pholoho?**

Ntate, Mora, le Moea o Halalelang ba ikopantse ho ba “sehlotšoana” seo sepheo sa sona e leng ho lopolla leloko la botho. “Leano la pholoho le qaliloe lipuisanong tsa Rabosafeleng ho toha bosahlaheng.”—Ellen G. White, *Fundamentals of Christian Education*, leq. 186. Ha ho ntho e bohlokoa ho Molimo ho feta ho pholosa ba bangata kamoo ho ka khonehang (1 Tim. 2:4, 2 Pet. 3:9). Lihlotšoana li ka ba le merero e mengata eo re tla ithuta eona thutong ea beke ena, empa morero oa eona oa sehlooho ke ho tsepama holim’a ho hapela batho ho Jesu. Ke hore, ka ho sebetsa ka lihlotšoana, ha re na thusa rona feela empa le ba bang. Ke hore, pakana ea mapomelo ea lihlotšoana tsa rona e lokela ho ba khapo ea meea.

**Nahanisisa ka sephiri sa bonngoe ba Molimo. Ke taba e thata ho utloisischa, ha ho joalo? Empa re ntse re ka e lumela, ra e tšepa leha re sa e utloisise ka botlalo, ha ho joalo? Hobaneng ha taba ee e le tšiea ea bohlokoa eo Bakreste ba loketseng ho e latela ha ho fluoa tabeng tsa tumelo?**

## Lihlotšoana Lengolong

Bibele e fana ka mehlala e mengata ea lihlotšoana thapelong, kopanong, ho khothatsaneng, le ho sebeletseng Kreste. Lihlotšoana tsena li file batho ba Molimo monyetla oa ho arorelana maikarabello le ho sebelisa lineo tsa bona tse fapaneng ka botlalo. Ke hore, lihlotšoana li ka re fa Molimo monyetla oa ho sebelisa e mong le e mong oa rona ka botlalo bo fetisang.

**Bala Exoda 18:21–25. Ke keletso e fe ea bohlokoa eo mohoe oa Moshe, Jethro a ileng a a e-fa Moshe ‘me ea etsa phetoho e kholo bakeng sa Moshe? Hobaneng ha leano le le ne le le bohlokoa haholo?**

Motho e mong le e mong kahare ho kampo ea Iseraele e ne e ba karolo ea sehlopha sa batho ba leshome, se etelletsoeng pele ke ofisiri e tšabang Molimo. Lihlotšoana tsena e ne e le tsa ho rarolla mathata, feela li ne li etsa le ho fetang hoo. E ne e le libaka tsa kopano tseo ho tsona mathata a ka thibeloang ‘me bophelo ba moea ba otlola. E ne e le libaka tsa pono moo maano a Molimo bakeng sa Iseraele a ka arorelanoang. Lihlopheng tse kang tsena, batho ba ne ba e-ba le monyetla oa ho etsa likamano tse tiileng tse nang le tsotellano tse neng li ka ba thusa bohle ho ikamahanya ho sebetsana le taba e fe le e fe eo ba neng ba tobana le eona. Ha ho potang—hoo joalo ka ha joale, batho ba ne ba sokolisoa ke lintho tseo ba bang ba ka ba thusang ka tsona. Lihlotšoana li fana ka monyetla oa kopano e mofuthu, kholo ea moea, le tharollo ea mathata. Hoa thabisa hore litsebi tsa lihlotšoana li re boholo ba sehlotšoana e lokela ho ba batho ba tšeletseng ho isa ho ba leshome le metso e ‘meli. Bona ke bona boholo boo Moshe le Jesu ba ileng ba bo sebelisa ho etsa lihlopha sa bona.

**Bala Luka 6:12, 13; Mattheu 10:1; le Mareka 3:13–15. Sepheo sa Jesu se ntlha-peli sa ho bitsa barutuoa e ne e le se fe le ho ba khetha ho ba karolo ea bosebeletsi ba Hae ba sehlotšoana?**

Sepheo sa Jesu sa ho bitsa barutuoa e ne e le ka bobeli ho ba lokisa moeeng le liketsong bakeng sa thomo ea bona lefatšeng. Ka ho ba le Eena, ba ne ba tla hola mohaung. Moelelong oa likopano tsa bona tsa sehlotšoana, ba ne ba tla ithuta ho sebeletsa ka katleho e fetisang. Letsatsi le letsatsi, ha ba ntse ba talimile Jesu ha a ntse a sebeletsa litlhoko tsa batho ba mo potileng, ba ne ba ithuta ka ho shebella na ba ka sebelisa lineo tsa bona joang. Sepheo sa Jesu ka lihlotšoana e ne e le ka bobeli khaho ea moea le boevangeli.

**Nahana ka nako eo u kileng oa ba har’a sehlotšoana sa batho, ho sa natse maemo, ba neng ba tsotellana ‘me ba sebeletsa pakana e tšoanang molemong oa bohle. U ile oa ithuta eng moo e ka u thusang ho utloisisa bohlokoa ba lihlotšoana boemong ba tumelo?**

## Ho Hlopheha Bakeng sa Tšebetso

**Bala 1 Bakorinthe 12:12–25. ‘Mele oa motho o fana ka pontšo e tsoang pele bakeng sa ho sebetsa hammoho ka lihlotšoana joang?’**

---

Pauluse ha a senole bohlokoa ba lineo tsa moea feela bophelong ba kereke, o boetse o eletse kamoo li ka hlophisoang kateng. O bua ka lineo tsa moea ka sebopeliso sa ‘mele oa Krete le kamoo o ka sebetsang kateng.

Boithuto ba popeho ea ‘mele oa motho bo bontša hore litho tsa ‘mele li hlophisehile ka tsela e nang le kamano. Mohlala, tlhophiseho ea tšilo, pelo, ho hema, le masapo ke mehlala e fokolang ea lithlophiseho tsa ‘mele tse thata. Lineo tsa moea li tšoana le litho tsa ‘mele. Li sebetsa hantle ha li kopane ka lihlopha. Hantle-ntle, hangata, li sitoa ho sebetsa ka bo mong. ‘Mele ea rona ha se pokella feela ea litho tse arohaneng tse iketsetsang seo li se ratang ka nako eo li se ratang. Tšebetso e ‘ngoe le e ‘ngoe ea ‘mele e hlophisehile ka tsela e lohellaneng haholo ho sebeletsa pakana e le ‘ngoe e tsoanang.

Tsena tsohle li re bolella ka tikoloho eo ho eona re ka tsebang ho sebelisa lineo tsa rona tsa moea ka tsela e ipabolang. Ho bonolo ho nyahama ha re sebetsa re le bang, empa ha re le karolo ea sehlotšoana sa batho ba nang le lithahasello le lipakana tse tsoanang, re fumana hore maleke a rona a ka topa habonolo ‘me a matlafatsoa haholo. Lihlotšoana li fana ka tikoloho e molemo ka ho fetisisa bakeng sa ho sebelisa lineo tsa rona tsa moea ‘me e ka ba khubu ea boevangeli ba phutheho ea rona.

Ellen G. White o tsoaea boleng ba lihlotšoana ka mantsoe ana: “Popo ea lihlotšoana e le motheo oa boiteko ba Bokreste ke e bontšitsoe ke Eena ea sa foseng. Haeba ho na le palo e khohle kahare ho kereke, ha litho li bope lihlotšoana, e seng feela ho sebeletsa kereke, empa le ho sebeletsa ba sa lumelang. Haeba sebakeng se le seng ho na le ba babeli ba bararo ba tsebang ‘nete, ha ba ikopanya ho etsa sehlotšoana sa basebetsi. Ba ke ba boloke tlamo ea bona ea bonngoe ba sa arohane, ba tsitlallela pele ka lerato le bonngoe, ba khothatsana ho tsoela pele, e mong le e mong a fumana khothatso le sebete ka thuso ea ba bang.” — *Testimonies for the Church*, vol. 7, maq. 21, 22. Bosebeletsi ba lihlotšoana bo hlophisitsoe ke Molimo molemong oa ho thusa setho ka seng ho hola moeeng, ho fihlela kopano e mofuthu, le ho sebelisa lineo tsa bona tseo ba li filoeng ke Molimo bakeng sa bosebeletsi.

**Nahana ka polelo ea Ellen G. White e kaholimo. E hlahlolle poleloana ka poleloana. Keletso ee ea leholimo re ka e sebelisa joang kerekeng ea rona?**

## Lihlotšoana tsa Testamente e Ncha

Kereke ea Testamente e Ncha e ile ea phahloha ke kholo. Ka lengoana tse seng kae e ile ea hola ho tloha sehlotšoaneng sa balumeli ho ea ho barapeli ba mashome a likete. Ho na le lintho tse ngata tse susumelitseng ho kena hona ho hongata ha balumeli le kholo ena e matla. Bosebeletsi ba Jesu bo ile ba jala peo ea evangeli 'me ba lokisetsa matšoele ho amohela ho ruta ha barutuoa. Kamor'a nyolohelo, Moea o Halalelang oa theoha ka matla a maholo ka tsatsi la Pentakonta, oa thehela holim'a barutuoa ba neng ba rapela ba bile ba lumela. Ntlha e 'ngoe e kentseng letsoho kholong ea sek'hahla ea kereke ea Testamente e Ncha ke tlhophiseho ea bona ea lihlotšoana. Lihlotšoana li ile tsa etsa phapano.

**Bala Liketso 18:1–5 le Liketso 20:1–4. U nahana ke hobaneng ha Luka a boletse mabitso a ba bang ba batho ba ne ba sebetsa le Pauluse?**

---

Ho a thahasellisa ho hlokomela hore Luka o bitsa mabitso a batho ba neng ba sebetsa le Pauluse. Ho eena e mong le e mong o ne a le bohlokoa. O ne a ba tseba ka mabitso. Ba ne ba tšehetsana bosebeletsing ba bona ba evangeli. Leha palo ea mabitso ao a a bitsitseng e le nyenyane, seo se thusa ho pakahatsa bohlokoa ba ho sebetsa hammoho, le ka lipalo tse nyenyane. E mong le mong oa batho bana ho lokela e be o ne a na le lineo tse fapaneng le tsa ba bang. Ba ne ba tsoa libakeng le meetlong e fapaneng. Tsela eo ba talimang litaba ka eona e ne e sa tšoane kamehla, empa e mong le e mong o ne a na le tlatsetso ea bohlokoa mosebetsing oa Krete. Lineo tsa bona tse fapaneng, libaka, le maiphihlelo li ne li tlatsetsa kholong ea kereke. Ba ne ba tlatsetsa thomong ea Krete ka bo mong ka menono ea boiphihlelo ba bona ka bo mong le Krete le nalane ea bona.

**Bapisa Liketso 16:11–15, 40; le Liketso 12:11, 12. Lidia o ile a fa Pauluse memo e fe hang kamor'a tšokoloho ea hae? Pauluse le Petrose ba ile ba ea kae kamor'a hore ba lokolloe chankaneng?**

---

Balumeli ba Testamente e Ncha ba ne ba atisa ho kopana malapeng. Mahae a Bakreste a ile a fetoha litsi tsa tšusumetso le khubu ea bosebeletsi ba lihlotšoana.

**A na u kile oa nahana ka ho qala bosebeletsi ba sehlotšoana lehaeng la hau kapa ho ikopanaya le motsoalle ho qala bosebeletsi ba sehlotšoana lehaeng la hae? Haeba u se u ntse u le karolo ea bosebeletsi ba sehlotšoana, nahana ka seo u ka se arolelanang le sehlopha sa hau sa Sabatha Sekolo bekeng ena ka melemo ea sona.**

## Lipheto-phetoho tsa Sehlotšoana

Lihlotšoana ke sesebelisoa seo Molimo a se sebelisang ho holisa kereke ea Hae. Ke “litšabelo” tsa batho bakeng sa ho bolela mathata a bona ‘me ba buisane ka tse ba khathatsang hammoho. Li fana ka monyetla oa kholo ea moea moelelong oa likamano tse nang le tsotello. Batho ba bangata bao e seng Bakreste ba ka photholloha hantle ha ba nka karolo lihlotšoaneng tse kopanelang lehaeng ho feta ho ea tšebeletsong ea kereke e tloaelehileng lekhethlo la pele.

**Bala Liketso 4:31, Liketso 12:12, le Liketso 20:17–19, 27–32. Etsa lethathamo la litšobotsi tsa lihlotšoana tsena tsa Testamente e Ncha. Lihlotšoana tsee li ne li sebetsana le liketso li fe?**

Bakreste ba pele ba ne ba bokana hammoho ho buella ba bang, ho rapella tse ba khathatsang ka ho tšoana, ho ba le kopano tsa setsoalle se mofuthu, ho ithuta Lentsoe la Molimo, ho fumana malebela a bosebeletsi, ho thusana ka ho sireletsana khahlanong le baruti ba bohata, le ho sebetsa ‘moho boevangeling. Lihlotšoana li etsa phapano. Batho ba kopanyang lineo tsa bona bosebeletsing, batho ba talimileng matleng a Moea o Halalelang bakeng sa boevangeli, ke sebetsa se matla matsohong a Morena.

**Bala Mattheu 9:37, 38. Jesu o re’ng ka kotulo, ‘me tharollo ea bothata boo ke e fe?**

Barutuo ba ne ba bona menyetla e fokolang feela bakeng sa khatelo pele ea evangeli, empa Jesu o ile a bona menyetla e meholo. O ile a arolelana litaba tse molemo le bona hore “kotulo e kholo ruri,” ea ba o supa bothata: “basebetsi ha ba bakae” (Matt.9:37). Tharollo ea Krete e ne e le ho rapela “Morena oa kotulo, hore a romele basebetsi kotulong ea hae” (Matt. 9:38). Lihlotšoana ke karabelo ea thapelo ea Jesu ‘me ka sekhahla se phahameng li eketsa lipalo tsa basebetsi bakeng sa kotulo ea Krete. Sepheo sa lihlotšoana tsohle tse atlehang ke bopaki le bosebeletsi. Bosebeletsi ba lihlotšoana bo tla phakisa bo e-shoa haeba chalimo ea bona e le kahare e seng kante. Haeba sehlotšoana se qetella se itšebeletsa se fetisa hanyane feela ho ba sehlopha sa lipuisano, se tla hloleha sepheong sa sona ‘me se lahleheloe ke lebaka la bohlokoa la ho phela ha sona. Lihlotšoana li teng ho tataisetsa batho ho Jesu, ho otlala tumelo ea bona ho Jesu, le ho ba fa malebela a ho paka ka Jesu.

**A na e ka ba Molimo o u biletsa ho qala sehlotšoana lehaeng la hau? Hobaneng u sa qale oa rapela Molimo ka seo e ka bang o ntse a ama pelo ea hau hore u se etse? E ka ‘na eaba u meeling ea nakong ea bophelo ba hau ba moea e khotsofatsang ka ho fetisisa.**

## Ho Ithuta Haholoanyane:

Lilemo tse ‘maloa tse fetileng kereke e ‘ngoe e nyenyane ea Europe e kathoko ho e ‘ngoe ea litoropo tse kholo tsa kontinente eo ea etsa qeto ea hore e lokela ho etsa ntho e ‘ngoe e kholo bakeng sa Morena. Kereke eo e ne e eme ‘nqa e le ‘ngoe. Ho ne ho se motho ea kolobelitsong ka lilemo. Haeba litaba li ntse li tsoela pele ka tsela eo, bokamoso ba kereke ena bo ne bo le lerootho. Moruti oa kereke a kopa leihlo la kereke ho rapela le ho nahana ka hloko seo ba ka se etsang. Eare ha ba ntse ba ithuta Testamente e Ncha, ba etsa qeto ea ho qala bosebeletsi ba lihlotšoana. Litho tse robong tsa phutheho tsa tšoara pono ena. Ba itella ho rapella ‘moho le ho ithuta na ba ka theha bosebeletsi ba bona ba sehlotšoana bo atlehileng joang. Kapele ba etsa qeto ea ho fetola mahae a bona ka bo mong litsi tsa boevangeli. Lihlopha tsena tsa ithuta ho sebelisa lineo tsa bona ka tsela tse fapaneng. Ba thakhola bosebeletsi ba thapelo le ba kamohelo ea baeti. Ba etsa metsoalle motseng. Ba nanabela batho ka ho ba mosa malapeng a bona, metsoalle, le ho bao e neng e le Baleti. Baetapele ba lihlotšoana ba qala boithuto ba Bibe le malapeng a robong ka baeti ba mashome a mane. Ba ne ba hlolletsoe ke seo Moea o Halalelang o se etsang. Khabareng batho ba leshome le metso e supileng ho ba mashome a mane bao ba kolobetsoa. Bopaki ba kereke eo e nyane e emeng tsi ke hore lihlotšoana li etsa phapano e kholo. Ke e ‘ngoe ea mekhoha ea Molimo ea ho amahanya litho tse ngata-ngata tsa kereke thomong ea kereke.

## Lipotso tsa Puisano:

1. Sehlopheng, buisanang ho tsoela pele ka lintlha tsa bohlokoa tsa sehlotšoana ka seng ho tseo ho buueng ka tsona thutong ea Labobeli. Ke lintho li fe tse ling tseo sehlotšoana se ka li etsang? Ke litsela li fe tseo ka tsona sehlotšoana se ka thusang ba nang le lineo tse khethehileng ba tsebe ho li sebelisa e le kannete ho feta nako e fetileng?
2. Hobaneng ho le bohlokoa hore lihlotšoana li boloke chalimo e kantle ea bosebeletsi? Ke hore, ho sa natse hore sehlopha se ka otlala le ho tšehetsa litho tsa sona ha kae, hobaneng se lokela ho boloka khaso ea evangeli khubung ea sona? Hobaneng, hape, sehlotšoana se lokelang ho lula se hokahane le kereke? Hobaneng ha taba eo e le bohlokoa haholo?
3. A na u kile oa ba karolo kapa oa utloela ka lihlotšoana tse sa kang ts sebetsa ka katleho tsa ba tsa qetella li shoeloe? Buisanang ka mabaka ao e ka bang sesosa sa taba ena.
4. Nahana ka pale e kaholimo, ea se etsahetseng Europe ka bosebeletsi ba sehlotšoana. U nahana ke hobaneng ha bo sebelitse hantle ha kaalo? Ba ile ba etsa eng eo ka litsela tse ngata e neng e le bonolo feela e sebetsang ka katleho? Hape hobaneng ho sebetsa tikolohong “e bolokehileng ka ho fetisa” ea lehae, khahlanong le ea mohaho oa kereke, e ka ba tsela e sebetsang ka katleho ea ho qala boevangeli motseng kapa sechabeng?